

Ulteriurs prodots da Tschlin: Chaschöl e tschigrun d'chavra e da bescha

Reactivà la chascharia da Tschlin

Daspö marz as poja cumprar in Engiadina Bassa chaschöl e tschigrun d'chavra e da bescha prodüt a Tschlin. Grazcha al permiss federal pudessan Chatrina e Peter Mair vender lur prodots dafatta daður cunfin.

(anr/fa) «Uossa cha noss uffants sun plü gronds e nu douvran plü l'agüd da la mamma d'eira meis giavüsch da chattar ün'occupaziun amo sper la chasada», disch Chatrina Mair, «scha pussibel in cumün.» Insembel cun seis hom Peter Mair ha ella ponderà che pussibilitats chi dess. «Cunquai cha meis hom es signun in Samignun e cha la chascharia da Tschlin d'eira gnüda libra causa cha la bieraria es gnüda translocada vaina pensà chi's pudess prodüer in quels locals alch tuot special.»

«Sco signun am d'eira cuntschaint cha chaschöl d'chavra e da bescha sun adüna plü retscherchats», disch Peter Mair, «perquai ans vaina miss in colliaziun cun paur indigens chi füssan prontos da furnir il lat bsögnà.» Ils paur Ernst e Rita Mayer sco eir Gian e Gaby Denoth s'han declerats prontos da furnir lat d'chavra ed Andri ed Ursina Caviezel lat d'bescha. «A nosa dumonda al cumün da pudair tour a fit la chascharia cun ün contrat a lunga dürada vaina survgni risposta positiva», cuntinuescha'l, «els han subito sustgnü noss'idea.» Davo ün viadi in plüs lös in Svizra per imprendere a cugnosccher eir otras chascharias s'ha miss il pèr in colliaziun cun l'uffizi respunsabel dal Chantun. «Da quel vaina survgni üna glista da check, ingio chi'd es precis indichà co cha'l fabricat ha dad esser», declera il signun, «cler, net e protet da muos-chas.» Avant co investir han els guardà schi saja eir avantman la cliantella per lur prodots.



Chatrina e Peter Mair cul tschigrun frais-ch.

fotografia: Flurin Andry

Divers butiers dals cumüns vaschins ed eir da cumüns plü dalöntschan demuossà interess. «Ün di han dumandà Richard e Susanna Marugg da Scuol scha no nu lessan surtour eir lur lat, ch'els lessan dar sü la producziun da chaschöl d'chavra», quinta Chatrina Mair, «dad els vaina pudü surtour eir ils cliaints, saja quai hotels, butias e privats dal lö.» Il prossem pass d'eira la finanziaziun dals indrizs e dals müdamaints prescrits. «Ün grond sustegn vaina gnü da l'anteriura società da chascharia da Tschlin chi vaivan reservà ün tschert import per quel chi metta darcheu in funcziun la chascharia», disch seis hom. Cur cha la chascharia d'eira pronta es ella gnüda inspecziunada dals uffizis respunsabels da Cuaira. «Sper las localitats sun gnüts examinats eir noss prodots, e cunquai cha'ls resultats sun stats buns vaina survgni eir sü da Berna il dret da producziun, no pudessan uossa dafatta exportar nos chaschöl e tschigrun sur cunfin.» Ernst Mair resta inavant

signun in Samignun e sia duonna Chatrina es respunsabla per la producziun a Tschlin.

Averta eir pels interessats

Davo avair drizzà aint tuot ha il pèr ponderà che chi dessan far cun quella surfatscha da la chascharia chi'd es restada: «Noss'idea füss quella da spordscher als interessats l'invista illa chascharia», declera Peter Mair, «gruppas da 15 fin 18 persunas varan la pussibilità dad observar tras fanestras co cha Chatrina prodüa chaschöl e tschigrun.» In quel local pon ils prodots eir gnir degustats. Implü han els l'intenziun da demonstrar da temp in temp qua co cha'l chaschöl gniva fat plü bod illa chalderra sur il fö avert. «Ils giasts pon collavurar, e cur cha'l chaschöl es madür, til tramettaina ad els», disch il signun.